

INUIT ATAQATIGIIT

INATSISARTUNI



UPA 2014/154.2
20. maj 2014
Naaja H. Nathanielsen

Naalackersuinikkut arlaannaannulluunniit attuumassuteqanngitsunik siunnersuisoqatigiinnik pilersitsisinnaaneq pillugu UKA2014-imut nassuiaasioqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Siunnersuisoqatigiit aatsitassarsiornermi aningaasaliisartut sanngisuussusiat aningaasaliisussarsiornermullu pilersaarutaat pillugit inassuteqaasiortassapput, pilersaarutit aalajangersimasut sanngisuussusiat pillugu paasissutissiisasallutik kiisalu aatsitassarsiornermi pilersaarutit ataasiakkaat siunissaq ungasinerusoq eqqarsaatigalugu piujuartitsineq tunngavigalugu inuiaqatigiinni ineriartortitsinermik nassataqarnissaat siuarsaaqataaffigissallugu. Tamanna pillugu siunnersuisoqatigiit Naalackersuisunut innuttaasunullu inassuteqaasiortassapput. Siunnersuisoqatigiit katitigaanerat, akissarsiaat pisinnaatitaanerilu pillugit ilutsit periarfissaasinnaasut nassuiaammi ilanngullugit nalilersorneqassapput.

(Inatsisartunut ilaasortat Naaja H. Nathanielsen aamma Sara Olsvig, Inuit Ataqatigiit)

Siunnersuutip matuma suliarineqarnera Inuit Ataqatigiit nipituumik tupigusuutigisariaqarparput

Siunnersuutip kinguneriumaagai Naalackersuisut ilisimaarilluarlugu paatsoorlugillu ingasaallugu nassuiaaserpaat. Tamanna aamma ataatsimiititaliamit isumaqatigiittumit tikkuarneqarpoq. Ingasattajaarneruallaqaaq Naalackersuisut oqarmata, aatsitassat pillugit siunnersuisartoqatigiit arlaannaannulluunniit attuumanngitsut Nunatsinni atorfimmik atornerluinerit sunniiniarnerillu annertusassagaat. Taamatut oqalliseriaaseqarneq ammut killissaasunik qaangiineruvoq nunamilu aqutsisunut ataqqinaataanngivilluni.

Atassutip siunnersuut siullermeerneqarmat taperserpaa. Tamannalu Atassutip siusinnerusukkut nalunaarutaanut naapertuuppoq, aatsitassat pillugit oqallinnermi nipi arlaannaannuulluunniit attuumanngitsoq pisariaqartinneqartoq oqaramik. Kisianni ataatsimiititaliami suliarinerata nalaani Atassut allamik isummerpoq, tunngavilersunngisaminik. Inuit Ataqatigiit paasivaat, Atassut nammineq isummersinnaatitaanngitsoq, aamma politikikkut pingaartitaq qitiusoq pillugu isummaminik allangortitsisartoq, naalackersuisooqatiminut iluareqqusaarluni. Isummanik allangortitseriasaarneq nassuiarneqarsinnaanngitsoq taamaattoq pillugu, Atassummik qinersisartut Inuit Ataqatigiittulli tupigusutsigissapput.

Siunnersuisartoqatigiit arlaannaannulluunnit attuumassuteqanngitsut pilersinnissaaannut periarfissat misissorumallugit nalunaarusiortoqarnissaanut naalackersuisooqatigiit akerliunerat Inuit Ataqatigiit paasisinnaanngilluinnarpaat. Siunnersuisartoqatigiinnik pilersitsisinnaanermik nalunaarusiornissaannaq allaat ernumanarsimangaarmat, siunnersuutip tunngavissaanngitsunik tunngavilersorlugu itingartinnissaa toqqarneqarpoq. Tassuunakkut takusinnaavarput naalackersuisooqatigiit ammanerunissamik inuiaqatigiinniillu peqataatitsinerunissamik oqaaserisartagaat, tassaaginnartut oqaatsit pappiaramut allatat imaqqanngitsut

Taama oqaaseqarluta Atassut kaammattorumavarput pineqartoq pillugu isummeqqaarni uterfigeqqullugit, siunnersuullu ilalerlugu taaseqqullugu.